

Verbod op veilings uiteindelik gelig

Die VF Plus verwelkom die aankondiging van die Minister van Landbou, Grondhervorming en Landelike ontwikkeling, Thoko Didiza, dat die verbod op veeveilings gelig word. Die verbod op veilings volg op die uitbreking van bek-en-klouseer in Limpopo.

Die VF Plus verwelkom maatreëls wat deur die minister aangekondig is om verdere uitbreking te voorkom en die situasie te monitor.

Die VF Plus het sedert die aankondiging van die uitbreking van die siekte in 2019

daarop aangedring dat die departement gesonde gebiede binne provinsies verklaar waarbinne veilings steeds kan plaasvind om sodoende te verseker dat die boere en die ekonomie van die provinsies nie ernstig benadeel word nie.

Suid-Afrika se landbousektor gaan reeds gebuk onder die onsekerheid van grondonteiening sonder vergoeding, die droogte wat die landbousektor reeds vir jare lank teister en die mees onlangse verbod op veilings weens bek-en-klouseer.

Die verbod op veilings het gelei tot 'n

ernstige ekonomiese verlies vir die landboubedryf wat na raming meer as R10 miljard beloop. Dit is 'n ernstige verlies, aangesien die veiling-industrie se omset, luidens 'n berig, R81 miljard per jaar is.

Die departement ervaar steeds 'n wesenlike tekort aan veeartse. Die VF Plus eis dat die departement so gou doenlik veeartse aanstel en die stelsel verbeter om verdere uitbreking van bek-en-klouseer te verhoed. Die departement moet seker maak dat die land se rooisones en grense beveilig word om te voorkom dat gesonde diere met

besmette diere in aanraking kom.

Die departement kan nie maatreëls aankondig en dit selektief toepas nie. Die VF Plus sal die departement verantwoordbaar hou om te verseker dat hierdie maatreëls deur die bank in alle kategorieë (kommersiële en ontwikkelend) van landbou gehoorsaam word.

Dit is belangrik dat die departement voorkomend optree ten opsigte van siektes soos bek-en-klouseer en nie, soos in hierdie geval, reaktief nie.

Tammy Breedt - VF Plus-LP en hoofwoordvoerder: Landbou

TERUGBLIK



IN DIE HEILBRON HERALD 22 AUGUSTUS 2014: SABT-SKOU OP HEILBRON

Selfs die koue, nat weer kon nie die Boerboelliefhebbers keer om te kon spog met hulle honde nie. Die oggend het Saterdag negeur afgeskop met die jonger honde. Teen twaalfuur het die kampioenskappe plaasgevind en is die algehele winners van die dag gekies. Die dag is gereël deur die Suid-Afrikaanse Boerboel Telersvereniging. Die organisasie, vertoners en toeskouers was baie beïndruk met die saal van die CVO-skool wat inderhaas reggemaak moes word om mens en dier uit die reën te hou. Op die foto: Grant Davids met sy hond Anderson Phoenix.

Neels Claasen oorlede na 'n lang siekbed



Neels Claasen is gebore in Heilbron op 30 Julie 1940 en woonagtig op Vlaklaagte. Hy was 'n boer en eienaar van Vlaklaagte Slaghuis, wat 'n sagte hart gehad het vir sy medemens. Hy is oorlede op 9

Februarie 2020 na 'n lang siekbed. Sy troosdiens het plaasgevind Donderdag, 13 Februarie vanuit die NG Moeder-gemeente Heilbron. Hy laat na sy eggenote Elna en drie kinders Annatjie, Peet, Corrie (Smurf) en ses kleinkinders.

Lede leer meer van boomgom



Die Dienssentrum lede bespreek amber en boomgom op 18 Februarie 2020. Amber is versteende boomgom wat onder andere gebruik word om juwele van te maak. Daar was ook geleer van baie ander toepassings van boomgom waarvan die lede nie geweet het nie. Sommiges het ander verspligtinge gehad vir die dag en het uit-gemis op nie net die interessante inligting nie, maar oor die heerlike waatlemoen na die tyd. Volgende week word die sessie verryk met inligting oor moesies, melanome en velkanker.

Het jy geweet?...

Druive, rosne en sjokolade is giftig vir honde. Is dit egter ook giftig vir voëls? Die gevaarlikste van die gewone menslike voedsel vir papegaai is die avokadopeer. Selfs 'n mondvul of twee kan 'n papegaai ernstige hartskade aanrig. Sjokolade,

suiwelprodukte en enigiets wat kafeïen, alkohol of baie sout en speserye bevat, is nie geskik vir voëls nie. Egter is druiwe en rosne, net soos die meeste ander vrugte, veilig vir voëls om in te neem.

Minimumloon verhoog werkloosheid, sê TLU SA

TLU SA is steeds gekant teen die minimumloon-stelsel in Suid-Afrika omdat dit bydra om mense buite die werksomgewing te hou en die ekonomie verswak.

Die verhoogde minimumloon is vandeeweek amptelik aangekondig en tree op 1 Maart 2020 in werking. Die 3,8% verhoging bring die minimumloon vir plaaswerkers op na R18,68 per uur, maar is ver onder die 12,5% waarop vakbonde aangedring het. Dit terwyl die werkloosheidsyfer vir die vierde kwartaal in 2019, verlede week as 29,1% aangedui is. Sowat 40% van Suid-Afrikane tussen die ouderdomme van 15 tot 34 is werkloos, en ook nie besig met die een of ander vorm van opleiding of tersiêre onderrig nie.

“Die ANC en sy alliansie-vennote het nie 'n saak met die ekonomie of werkloosheid in die land nie en tree slegs in belang van hulle lede op,” sê mnr. Louis Meintjes, die president van TLU SA. “Die beperking van 'n minimumloon ontnem 'n persoon wat wel bereid is om te onderhandel vir sy loon, van 'n werksgeleentheid.

“As iemand bereid is om as 'n plaaswerker te werk vir 'n loon van byvoorbeeld R2 500 teenoor die gedwonge R3 360 per maand,

omdat dit is wat die boer kan bekostig, gee jy aan daardie persoon die waardigheid om nie van 'n staatstoelae of bedelary afhanklik te wees vir oorlewing nie,” sê mnr. Meintjes. “Wanneer meer mense in 'n gesin kan werk, is die gesamentlike inkomste van die gesin dan mos ook hoër, as wanneer net een persoon in die gesin – teen 'n hoër loon – kan werk.

“Ten spyte van wat opstokers mense wil laat glo, gee boere wel om vir hulle werkers en wil ons graag hê hulle moet beter lewens hê. Maar, om dit moeiliker te maak om meer werkers in diens te neem, is teenproduktief.”

Deur aan te dring op absurde lone word die werkgewer wat dit nie kan bekostig nie, die werker wat nie in diens geneem word nie en die ekonomie wat nie plaaslike groei toon nie, benadeel. 'n Minimumloon-stelsel kan slegs suksesvol wees om mense op te hef, in 'n gestabiliseerde ekonomie. In die huidige Suid-Afrikaanse beleidsomgewing en ekonomie, dra dit egter net by tot werkloosheid en 'n afhanklikheid van staatstoelae.

Navrae: Mnr Louis Meintjes, President TLU SA, Sel.: 082 461 7262 en Mnr Bennie van Zyl, Hoofbestuurder TLU SA, Sel.: 082 466 4470